

四庫全書

集部

欽定四庫全書

江湖後集卷二十二

宋 陳起 撰

俞桂

桂字晞邨仁和人紹定五年進士有漁溪詩稿  
見遺書本茲葺自永樂大典中補詩八首

採蓮曲

朝露濕妾衣暮霞耀妾矚一葉小如瓜  
去住無拘束兀棹歌採菱襲襲薰風足  
蘆葉映港清捉對鴛鴦浴蓮中

有苦心欲折手還曲折蓮恐傷藕藕斷絲難續

平湖淼淼蓮風清花開映日紅妝明一雙鸕鶿忽飛去  
為驚花底蘭橈鳴蘭橈蕩漾誰家女雲鬟髻黛眉嫵  
采采荷花滿袖香荷深忘却歸時路

西湖西畔荷花多扣舷女兒嬌唱歌道旁駿馬金巨羅  
欲住不住橫秋波放船却入花深處臨流照妝噤不語  
南山起雲北山雨折得荷花不歸去弄波驚起鴛鴦雙  
水珠濺濕芙蓉裳恨無飛羽致汝旁遡洄從之雲路長

西風引袂涼雲起鴛鴦扶船浮淥水露沁花脂茜粉香  
滿柄鋒芒刺葱指紅綃半妥金釧明堤上六郎闕唱聲  
湘中暮雨歡期失各自東西空目成船蕩波心烟漠漠  
歸路花從唱邊落綠艷紅妖江水深水底靈均應不覺  
女伴歌採蓮清聲度流水無意驚鴛鴦鴛鴦自飛起  
荷葉籠頭學道情花妝那似妾妝清雙雙頭白猶交頸  
翻笑鴛鴦不老成

拋落圓房響釧金背人細數子藏深不嫌到手多尖刺

祇怕傷人有苦心

提幹漁溪

不涉驚濤心自穩  
柳陰陰處著孤舟  
的知世路多機穽  
一線閒名付直鉤

武衍

衍字朝宗汴人遺書本所載適安藏拙餘稿一  
卷皆絕句適安乙藁一卷古今詩茲葺自永樂  
大典中者題曰適安藏拙餘藁續卷乃世所行

本不復見者也

白鶴愁

白鶴愁竹葉窄凋玄裳縑素翮夕陽移影瘦空庭秋草  
碧

白鶴愁竹葉低秋夜清思歸飛天風吹夢落明月冷瑤  
池

題楊伯起菊莊圖

落落莊中人英英霜下傑酌水擷清露餐香帶寒月顏

齡良可制高興未渠輟醉憤岸西風長吟髯吹雪

復歸絲桐

原注 琴名  
玉壺冰

芸居以詩見賀紀述備盡

報以長篇兼簡葵牕

爨桐制作妙莫傳冥搜恰恰三十年大雷小雷不可見  
一生夢想空流涎玉壺冰本王氏物拍下琅然頗清越  
不知傳來凡幾姓隱隱蛇跗細如髮銅駝陌上春風和  
湖邊得侶相委蛇古囊提携帶詩酒一時樂事何其多  
座有知音豈容已膝上泠泠寫流水夕陽催雨入烟城

回憶清歡如夢裏孟光有問我獲疑匣中朱絲胡不歸  
鄰翁篝燈出相慰官河權夫猶可追踉蹌十里夜幾午  
認得登舟元處所始知尤物果累人終喜明珠還合浦  
拂拭徽絃正孤坐欲記微吟未成課忽聞風外剝啄聲  
報道芸居以詩賀

謝芸居惠歛石廣香

家無長物祇書卷又無良田惟破硯寥寥此道人共嗤  
君獨相憐復相善鄴侯架中三萬籤半是生平未曾見



一癡容借印疑似留客談玄坐忘倦探懷忽出片石方  
雙池絲刷潤且光芙蓉溪深古坑遠論新品舊殊未遑  
慷慨珍投意何永更配番禺心字餅歸來喜歡舉廢典  
春雨書樓閤深靜手抄義經誤未刊塵侵商鼎灰久寒  
便燒團煤炙雲母旋滴清泉凝露溥點朱塗黃細商確  
時有烟絲裊風暮心融終日游聖涯恍若置身天祿閣

謝秀松庵蒲大韶墨

古來墨工號奇手廷珪仲將骨已朽老蒲近世曾獨步

伐盡西岷古松肘天收此老五十年膠法源流無復有  
松庵講師出一挺自說藏來為最久聯翩雙鳳飛雲頭  
覩若光鑒照窓牖後來制作無此樣盈尺笏頤堅且厚  
十年一寸玉不如持以銜人人識否誠齋有詩昔曾誦  
始信得名渠不苟松庵識人欲炙色勇割見投歸我袖  
摩挲把玩何時休巾籠永言珍所授一生當著幾兩屐  
性嗜遠慚蘇子後家有中巖舊坑硯歸試寒窓雲碧溜  
却愁癡坐學臨書畫竹不成徒似柳

月中桂

詩人欲斫月中桂不知上有西河生年年奮斤伐仙樹  
帝愁桂長侵蟾精今夕月團團似扇桂影分明月中見  
廣庭香薄悲姮娥留得喬枝罩孤殿

題薛益齋所藏馬遠夜潮圖兼簡方孤雲

海天雲刷青漫漫天風飛上白玉盤濕銀山橫出空濶  
盪來一色涵芒寒錢塘江頭奇絕者費盡丹青最難寫  
是誰吮筆貌天真應奉上方人姓馬馬生後進甲等倫

妙處或能肩古人當時運意入縑素浩然心府空無塵  
壁間挂起忽驚異秋色滿堂醒客醉請君收卷勿復觀  
中有鴈夷千古泪

有所思寄二琴友

懷伊人兮在帝鄉山月白兮秋夜長流泉響絕橫秋牀  
感而不寐摧我腸美人遺我正始音何以報之百鍊金  
相睽相離兮歲月深欲往從之兮夢難尋

懷伊人兮在東粵山月出兮寒照雪匣塵不拂朱絲折

感而不寐心忉結美人贈我璫璵樂何以報之和氏璞  
相思相望今天一角欲往從之兮雲路邈

次韻簡吳靜庵

冰雪親玄論塵埃洗客衣幾回晨見速長是晚忘歸壺  
裏春常在人間事盡揮樊籠狂鬧者回首悟前非  
畫展唐摩詰書藏晉右軍滿樓宣賜物插架古遺文竹  
影三更月爐香一縷雲有誰知此趣孤鶴語慙勤

次芸居湖中韻

放櫂湖心去風恬雨盡時  
挿天青嶂合戀水白雲飛  
酌醉杯頻舉携蒲局屢移  
碧蓮香不斷歸路浥人衣

送汪謙齋赴松陽簿

愛爾名家千里駒別親遠  
宦問津初要知撫字覘為  
錦豈但勾稽事出朱青眼  
相逢須入幕綠牕得暇且  
觀書故人此外無他屬嵐  
翠高寒保二雛

謝友人惠簞兼簡儲文卿

風戲秋波細織成展來堂  
上眼增明若因古制當為  
席

或用方言強作笙居士未眠心已爽此君到死骨猶清  
呼兒掃淨池軒上便欲移床聽雨聲

遇故人會飲分韻得山字

騰呼歡伯作清歡百日終無此日間苦被俗緣欺綠髮  
莫談世事對青山一天秋色鴈聲外十里香風桂子間  
光景易流人易散杖頭須帶夕陽還

琴川致道觀簡葉制幾

歸然樓殿壓崇岡八百年来古道場三級危壇封翠蘚

七星靈檜滴清霜丹空綠合人何在塵滿朱欄井尚香  
絕愛陰符碑字古每來摸索立脩廊

送汪耘業赴番禺判官

柳寒莫折折官梅持贈君行盡此盃惜別不能無泪落  
相逢難得便心開改絃作意趨元幕通籍那愁滯遠才  
拍點芝山應更喜板輿迎自日邊來

白髮詩

白髮晶晶抑可吁  
鑷來渾覺鬢邊疎  
近緣病起頻添此



全謂吟多枉謗渠老境漸侵羞覽鏡清晨閒理不勝梳  
頭顱如許真堪笑猶向書中作蠹魚

觀碁

洞口雲深晝景遲支筇閒看野人棋路無寬褊眼須活  
機有淺深心自知忽忽滿盤紛黑白明明一著繫安危  
要當險處精神到何用頻更局面為

憶舊遊

二十年前氣頗豪每逢潮上客相招松間躍馬遊三竺

花底移舟醉六橋拂壁便題誇得句扣舷相和索吹簫  
欲尋此樂何時再對水看山意未消

宜永雜興

雙蝶來何許騰騰翅粉妍  
蔚然風遠去却在棟花邊  
簷隙蒲蘆祝籬根媚耀飛靜中觀物化頗亦見天機  
竹偃竿竿碧桎搖穗穗紅午過書未讀清坐一簾風  
臨字每僵指鍊詩常斷鬚不知勤苦學學到古人無

呼猿洞

雲裏諸峯冷未開  
洞深無路陟崔嵬  
杖藜斲石驚猿去  
却倩山僧喚得回

積雪折竹有感

清修抱節碧欄東  
積雪俄摧玉一叢  
擬奏通明効滕六  
祇愁天路有剛風

寓吳氏園

杏花風裏蝶翻翻  
池館無人自往還  
不把詩來供日課  
也難消遣許多閒

寄番禺判官汪耘業

賞音投合事非難  
五鷄齊鳴上九闕  
從此暮雲休悵望  
春風催入紫宸班

跋龍眠春牧圖

鐵脊驕驄玉面騾  
分明相逐下晴坡  
當時不聽支郎語  
駿骨人間應是多

冷泉亭

鳥語泉聲自抑揚  
松風時拂藥花香  
老僧坐足歸寮去

替與遊人憇晚涼

清湖

兩河秋水碧融融  
鑿得西湖一脈通  
流去有聲曾細聽  
市橋人靜月明中

遊南山

屐齒黏雲上石梯  
躋攀巉絕立移時  
好奇一世應成癖  
咋指從來笑退之

上山得似下山輕  
不用筇枝緩緩行  
行到水邊才覺倦

却浮一葉指煙城

金林檎花

半拂馬支帶露香  
玉環春晚試新妝  
三郎晚節無公論  
剛把豐肌比海棠

步虛詞四闋壽吳靜庵

朝元天路慶雲多  
桂樹吹香冷鬱羅  
應為仙翁今日壽  
玲瓏環佩下星河

紫鳳銜書出九關  
頻年光動虎林山  
龍奎錫號恩雖異

自視浮榮祇等閒

欲識吾庵以靜名內觀何有外無形探天別得長生訣  
獨抱清明合至靈

金簡標名玉篆階莫將松鶴擬年華逍遙太極秋光裏  
細挹天漿對菊花

恭謝慶成詩十闕

二載明禋帝意專辦香合謝祖宗前向來盛典從頭數  
紹述應須億萬年

麝蠟籠紗絜玉階珠槃齊撒九門開一天星斗明如月  
法駕徐縈出殿來

宮監推簾探曉星景陽鐘動已妝成鳳輿陸續銜車馬  
黃道香濃尾駕行

禮成列聖宴羣工浩蕩春風到竹宮傳旨簪花俄似錦  
信知天子是天公

大官宣勸禮優寬中殿妃嬪各盡懽和氣滿城天色好  
不妨直際晚回鑾



樂奏僊韶進壽觥  
觥稜風細寶香清  
隔簾微見龍顏啟  
緣是優人有笑聲

宮前儀衛尚般還  
花裏聲傳午漏殘  
見說御園才放水  
聖心游泳正觀瀾

染羅彫草幹天機  
簇戴工夫闢出奇  
惟有近臣恩數異  
尚方別賜細欒枝

小白長紅十里春  
歸來天仗擁香塵  
翩翩黃屋彤霞裏  
輦上無花止一人

士庶重重間綺羅  
霽光熏作小春和  
御街兩行瞻天表  
比似前回人更多

蠟梅二絕句

磬口檀心紫暈重  
繁香微洩繡簾風  
照花休用添紅燭  
却怕輕明煖易融

賦得姿容類至中  
梢枝宿葉又春風  
品題雖入江梅譜  
可惜名同韻不同

遊吳門同樂園書池光亭壁呈使君張都承

一城和氣萬花春  
金碧樓臺處處新  
太守不孤同樂意  
木蘭堂上看遊人

書扇

榴花枝上雨冥迷  
睡起鉤簾放燕歸  
簷玉無聲窓几潤  
一篝香靄自熏衣

江湖後集卷二十二









欽定四庫全書

集部  
江湖後集卷二十四



詳校官庶吉士臣朱理

助教臣常循覆勘

總校官進士臣繆珙  
校對官編修臣勵守謙  
謄錄監生臣張曾壇

欽定四庫全書

江湖後集卷二十三

宋 陳起 撰

吳仲孚

仲孚字惟信雪川人仲方之弟有菊潭詩集見遺書本茲茸自永樂大典中補詩五首

呈蒙齋

出處真麟鳳詩書得正傳仁心全造化風骨半神仙門柳搖春雨庭花鎖暮烟雲臺非隱地即日帝王宣

上湖守趙希蒼

方今選牧匪為輕果見名邦付老成  
白髮益堅憂國念  
丹心常蘊愛君誠  
月遷花影麗無吠  
風舞棠陰鶴自行  
看着碧瀾堂下水  
與君政事一般清

德大才優世所宗  
漢唐諸老莫如公  
高明正直行王事  
耿介清廉繼父風  
六邑人居條教內  
萬家春出笑談中  
即看詔促歸清禁  
手把梅花馬首東

上高疎寮處州守

神仙來守神仙地  
銘石庭空畫戟森  
道接聖賢韓愈學  
詩關風教杜陵心  
二年鼓角傳清調  
萬古溪山得賞音  
即有詔書催入覲  
金蓮夜草玉堂深

呈岳總卿

黃塵漠漠路漫漫  
舊釣空思水國寒  
鄉信不來雲樹遠  
斜陽無語下欄干

胡仲參

仲參字希道清源人  
仲弓之弟有竹莊小藁見

遺書本茲葺自永樂大典中補詩五首

吳王試劍石

吳王鑄劍成自謂古難比試之高山巔石裂斷橫理那  
無昔時人相逢干將里故宮宮中白日長春風野田百  
草香有誰慷慨不平事被褐踏花推酒缸

次林庭植留別韻

麴生皆可醉何必問醇醪浩氣長看劍愁腸半貯詩歸  
舟無麥載去路有梅隨瘴海風波惡此行君自知

王用和屢言別而未歸願齋有詩戲之次韻奉寄

幾度西郊餞馬塵曾將尺素托文鱗  
荷盃酌盡開懷酒柳線縈回有腳春  
瘴海自多流落客陽關少見別離人  
出門有礙何為者徒負江湖老在身

留別社友

漫浪歸來六換秋又携書劍入皇州  
得些湖海元龍氣作箇山川司馬游  
奔走客塵因念脚勾牽時事上眉頭

中朝滿目皆知已還有篇詩遣寄不

和王和禮留別韻

歸騎忽忽十日程客身猶自戀桐城未應江左追王建  
且去隆中卧孔明雞黍幾番陪夜話鶯花一路伴伶聲  
秦溪溪上無風浪好與白鷗尋舊盟

姚鏞

鏞字希聲號敬庵剡溪人嘉定十年進士吉州  
判官以平冠功擢守贛州後貶衡陽有雪蓬集

見遺書本茲葺自永樂大典中補詩六首

北高峯詩

閑處春光淡逢僧共採蒿曲盤山磴險直上塔峯高風  
露侵衣冷江湖送眼豪近年無隱者空負數株桃

送僧孤峯

分得西林雲滿巢辦香端為遠公燒阿兄不解陶潛飲  
只倚山中水一瓢

贈孤峯



拄杖尋幽古寺中  
雲容淡淡雨濛濛  
歸來一笑春多事  
野杏山桃各自紅

憶孤峯

浮杯方渡湘江上  
又逐孤雲到嶽前  
七十二峯烟雨夜  
與誰同話懶殘禪

題孤峯房

雲木陰森天氣清  
杜鵑啼了又啼鶯  
幽人午枕不成夢  
憶得故山春樹生

龜泉松

未讓葛洪丹井靈石根流水更清冷多年不見仙桃出  
化作老松生茯苓

戴復古

復古字式之天台人嘗登陸放翁之門以詩鳴  
江湖間有石屏續稿見遺書本王士禎居易錄  
云石屏以詩名而多直率然氣骨終勝今葺自  
永樂大典中補詩六首

求先人墨迹呈表兄黃季文

我翁本詩仙游戲滄海上引手掣鯨鯢失脚墮塵網身  
窮道則腴年高氣彌壯平生無長物飲盡千斛釀傳家  
古錦囊自作金玉想篇章久零落人間渺餘響搜求二  
十年痛淚濕黃壤君家圖書府墨色照青嶂我翁有遺  
跡數紙古田樣髣髴鍾王體吟句更豪放把玩竹林間  
寒風起悽愴昂昂野鶴姿愧無中散狀兒孤襁褓中家風  
隨掃蕩於茲見筆法可想翁無恙幽居寂寞鄉風月共

來往衆醜成獨妍羣瘖怪孤唱一生既蹉跎人琴遂俱  
喪托君名不朽斯文豈天相舊作忽新傳識者動慨賞  
嗟余忝厥嗣朝夕愧俯仰敢墜顯揚思幽光發草莽假  
此見諸公丐銘松栢壙君其啟惠心慰彼九泉望

春後呈趙懶菴

久望春風至還經閏月遲梅花丈人行柳色少年時愛  
酒常無伴吟詩近得師離騷變風雅當效楚臣為

癸巳端午呈李伯高

客裏幾逢端午節看成雪鬢與霜鬢救人採得三年艾  
背世翻成六日蟾老境可憐歸未得羈懷長是病相兼  
猛思一醉酬風月笑撚菖花揭酒帘

長沙呈趙東巖運使併簡幕中楊唯叔通判諸  
丈

日暮遠途行未休白頭又作長沙遊湘江一點不容俗  
嶽麓四時皆是秋香草汀州付騷客紅蓮幕府聚名流  
吟邊萬象寫不得上有風流趙倚樓

到南昌呈宋愿父黄子鲁诸丈

一秋無便寄平安  
新鴈聲聲報早寒  
昨夜檢衣開故篋  
去年家信把來看

扁舟幾度到南昌  
東望家山道路長  
醉裏不知身是客  
故人多處亦吾鄉

危稹

稹字逢吉臨川人有異齋稿見遺書本茲葺自

永樂大典中補詩三首

日漾水影於窻變態千萬因為之歌

日在天水在池溶溶漾出黃琉璃須臾影上白雪窻爭  
奇角異無不為金鱗鱗玉絲絲鳳花織錦天孫機浮雲  
疾流星漢動老樹破碎光參差魚跳暈車輪蝦出展圓  
鏡一物動其間皆足助其勝小兒弄影嗔未大兩手抱  
石波心墮忽見千丈萬丈金蛇飛鐵騎無聲雪山過中  
有神人高丈許金冠塞我軀幹武眼花不即辨誰何徐  
觀炯炯欄干露須知變態無定時要此中間為砥柱其

餘妙處不可寫古來大明難繪畫君思舞劍悟書法況  
今讀書天影下不妨着眼為端詳此是天下真文章有  
能融化入吾用可使筆端萬丈生光芒初不必垂文希  
價咸陽市亦不必矜誇作賦中書堂請求天黼黻上補  
舜衣裳大作文明治昭然燭萬方

和靖逸韻

觀書入聖肯成癡宴坐湖邊閱四時桂窟風高還子在  
梅村月冷少人知心安競病便成句手約敲推更問誰



霜後江山清到骨明朝高處共尋詩

送孫行之出守衡陽

日日江頭送客行況聞君去作專城心存臣子無中外  
士繫朝廷有重輕諫疏滿懷催上道中原萬事想關情  
戎葵到底還傾日側耳衡陽來雁聲

徐集孫

集孫字義夫建安人有竹所吟稿見遺書本今  
葺自永樂大典中補詩二首

本心參政約游西山分韻得頂字

僕僕事行役度盡千峯頂恣覽亦云倦困卧殊未醒西  
爽俄見要前約欲重訂結習若猶在寧復計兩脰天際  
豁輕陰溪頭橫短艇搖手謝籃輿信步躡荒徑適意自  
忘遠迷途誰為詞此翁平生意故自畧畦町何妨一笑  
回呼童催煮茗兩年已三至我如飫五鼎無乃大屬厭  
徒欲逃酩酊老筆忽先倡高標誰與並尚記去載游金  
碧光炯炯何處非吾鄉一氣相溟滓

卷二十三  
余種竹方成扁其室曰竹所友人以詩至用其  
韻

屋老苔荒席久虛近分一榻與雲俱梅花未種招蜂怨  
竹所雖青欠鶴圖無事看山如對客有時隱几亦忘吾  
過門除却能吟者不是高僧即老儒

朱繼芳

繼芳字季實建安人紹定五年進士有靜佳乙  
橐見遺書本今葺自永樂大典中補詩二十四

首

失題

千年白蝙蝠來往撲人衣  
洞黑鬼相語天寒僧未歸  
巖溫生石乳烟起作林霏  
城裏遙看處唯應一翠微

松澤西亭

高人太多事寒夜本無魚  
船子今何許涇流只似初  
白蘋秋浩蕩黃葉晚蕭疎  
更有斯亭在乾坤一草廬

桐江舟夜

欽定四庫全書

江表集  
卷二十三

蕩槩入虛碧星河俱動搖前村漁火近別浦鴈聲遙對  
景知明月回頭得暗潮桐廬在何許江路夜迢迢

十暑

十暑江湖客塵縑白苧衫人浣沙島路風捲海門帆帶  
雨厨煙重通潮井脉鹹家書言不盡重拆又重緘

西湖別業

寥寥湖上趣大似水雲僧故國經年夢寒窗獨夜燈鞭  
聲爭輦道月色淡觚稜一覺平明睡都人却未能

春遊

雨過青青草湖邊信馬蹄  
夕陽沙路遠春水板橋低  
柳暗漁人屋花香燕子泥  
摩挲酒家壁留着醉時題

秋風

秋風欺病客力氣復何如  
髮短絲無數衣寬帶有餘  
見人慵作禮聞鴈強裁書  
門外生秋草呼童不要除

再拜閬風帥幹寶謨郎中

家世蜀青城搏扶幾萬程  
神遊應八表骨鍊已三生  
舉

酒呼麟脯吹笙荅鳳鳴欲將余馬絀蜷局不堪行

刺桐

刺桐依客舍晴綠上窻紗昨夜還飛葉來時未作花  
寒驚月色人老惜年華今度逢搖落歸心一倍加

清明

餉面留寒不肯濃一年春事看成空人歌人哭清明日  
花落花開昨夜風薄薄絮泥行燕子深深菱蕩出鳬翁  
西陵橋上多車馬有底狂馳百歲中

新秋雜興

晚烟起處是孤村  
漠漠郊原白道分  
菰葉池塘疎雨過  
豆花籬落夕陽曛  
遠山空闊圍天在  
隣杵丁東帶鴈聞  
獨自尋詩風滿袖  
不知身入白鷗羣

和政和顏令君韻

恰百年餘得縣名  
從前官長是誰清  
魚鮭市小通蠻遠  
鷄犬村深見吏生  
過客莫嗔厨傳冷  
家人方喜俸錢輕  
却愁明日朝天去  
不得黃紬飽五更



壽尚書意一先生

天上麒麟地上行當年孔釋送徐卿  
重來司馬兒童喜初見歐陽老婢驚  
黃道日開經幄霽紫垣星近履約明  
本朝寶策千千歲惟讀書人共太平

閒觀

閒觀造化餘靜極悅自性胡蝶忽飛來  
吾心已無競

幽尋

幽尋興不淺歸路故遲遲猿斷空山  
荅人行片月隨

冷泉亭

白猿弄清泚秋入山骨冷老僧怯憑欄忽失架梁影

溪橋

雲歸洞府癡龍睡日澹山椒倦翼還橋上行人橋下水  
如今日夜不曾閒

見野祭者

餬粥初香未賜烟百金難買過湖船南崖山下何年骨  
猶向人間覓紙錢

疎山矮師叔道場

白雲深處水茫茫四百年餘古道場  
我來不見矮師叔  
手種樹身今許長

行都春事詩

紫陌無泥雨後天綠陰多處正鞦韆  
土風未必知農事  
也聽村夫說種田

蝶

看見青蟲作蝶時不知蝶是此身非  
牀頭為有南華卷

午枕酣來忽夢飛

張子中牡丹圖

寫來猶自挾春嬌  
想見當年魏與姚  
花外小車看未了  
杜鵑聲裏洛陽橋

次韻胡仲方因楊伯子見寄

此去廬陵定幾程  
向來筇杖未經行  
懸知征棹雲邊集  
大有吟情雪裏生

楚渡食萍應甚美  
舜祠吹玉直能清  
二君即日青冥上

唯我青山帶雨耕

陳必復

必復字無咎長樂人淳祐十年進士有山居吟  
稿見遺書本今葺自永樂大典中補詩二十九  
首

春日偕遊響應山觀瀑泉飲漱玉亭上分複磴  
擁危泉賦磴韻十四

溪山晴色妍桃李春意賸野服烏角巾郊游偶乘興同

行皆好賓樂此境物勝古寺臨清潭鳴泉落危磴孤亭  
上雲雨木末渺難認林深行漸迷谷虛語相應陰壑號  
悲風懸蘿礙飛鏗掃花坐寒石意與幽事稱崖巔記曾  
遊蘚濕墨痕凝登高浩懷古歲月如墮甑百年幾朝昏  
今昔一長凭道人苦將迎頗亦厭車乘他時營菟裘隙  
地儻可贈舉杯酌山靈茲語為我證

題東坡畫像

東坡先生謫仙人騎鯨海宇幾十春麾呵日月斥八極

笑觸豐缺天不嗔萬里歸來故無恙諸公非復先朝臣  
空令後世拜公像洛陽宮闕今成塵

村家

遶郭一溪斜溪村八九家招邀過鄰里款曲話桑麻老  
樹低眠石寒流淺漱沙吾生尚萍梗媿爾獨興嗟

積潦簡友人

暝鎖層陰重靈深失遠壑積流上籬落飛影度欄干石  
髮梳風瘦垣衣護雨寒深懷裹飯去終媿往來難

葦邇

葦邇通支港舟行倚岸斜曉沙含宿雨老樹著疎花歲  
月春城暮人烟水驛賒仍年為客恨飄泊祗堪嗟

東吳逆旅

他鄉又寒食牢落動歸心世事少如意明時無賞音江  
湖千里客桑柘一春深昨夜還家夢西窻見綠陰

遠遊

關山勞眺望宇宙憶經行地隔南溟斷天低北斗橫高



誰聞遠柝孤枕歷寒更隻影惟堪弔殊鄉鮮弟兄

雨晴小步

蠶月家家靜村流處處深草分兩岸色竹覆半池陰少  
飲亦微醉獨行還自吟兒童怪相問爭識野夫心

晨征

亂山迎馬首樹色辨微茫犬吠一村月鴉啼滿屋霜近  
郊人語早遠市漏聲長隔岼誰家園疎梅出短牆

出郭

泥深留屐齒出郭少人行遠磬含餘韻疎簾透薄明浮  
雲時態異流水世情輕只讀南華了年來悟養生

郊行

夏半餘寒在新秧綠未齊僧歸知有寺水盡覺無谿疎  
徑風行籜空庭鳥篆泥東郊有幽致小暇一扶藜

漏長

漏長知夜久夢薄覺衣輕曙月侵霜白寒星度水明遙  
空一鴈過鄰屋數雞鳴著論吾寧敢徐徐待老成

意行

簡出少過從前遊仙夢中寒峰千嶺碧霜葉半林紅霽  
表浮餘景明邊落去鴻意行隨所止端未哭塗窮

偶出

野店荒雞曙籬荆帶暝開漏聲隨雨盡山色傍船來事  
業歸書卷生涯付酒杯溪翁往還慣不怕白鷗猜

書西齋几

半枕午窻夢一聲啼鳥清雨深花有恨春老柳無情退

覺身名重閒知世事輕杜門非謝客懶甚闕將迎

遲客小軒

約客久不至春明坐小軒牆陰侵霽色簷暈上波痕晴  
色麥花老暖風鶯語繁午庭人寂寂桃李亦無言

賦叅政叔祖水亭

一段漁歌起夕陽溪山佳處欠平章受風楊柳絲絲弱  
臨水軒窻面面涼約客有時同把酒橫琴無事自燒香  
沙頭鷗鳥忘機久却被官船去較忙

夜宿山庵

扣宿精廬旋啓扉  
佛香未冷坐多時  
分僧一半雲歸榻  
借竹幾些風入詩  
隔夢聽鐘疑寺遠  
避寒移枕覺宵遲  
起看猶有殘窻月  
春雪滿山啼子規

書齋戲題

數簷隙地葺幽齋  
小作軒窻傍竹開  
行蟻上緣風折笋  
飢鴉爭啄雨殘梅  
閉門惟有讀書樂  
愛客苦無佳士來  
最憶西湖柳陰底  
扁舟欲去尚徘徊

江湖

江湖路遠總風波欲向山中製芰荷黃葉落來秋色晚  
亂鴉歸處夕陽多慣經世態知時異拙為身謀惜歲過  
有屋一區田二頃分無清夢到鳴珂

過隱者居

瘦筇獨與鶴相隨行盡荒郊入翠微溪鳥喜晴將子浴  
山蜂傍暖採花歸空村歲月徵書晚深徑蒿萊客屨稀  
久欲依居圖別業自愁無計泣牛衣

奉酬陳介庵明府桐江見寄

寒侵征袖客先知  
曉角吹霜下客衣  
歸興只緣松菊晚  
宦情肯為稻粱肥  
山村日落人收市  
海浦風生浪打圍  
悵悵詩成無便寄  
夜深暗遣夢魂歸

戲折竹葉為舟示奚奴

乃翁兒戲可憐生  
折葉浮舟趁岸行  
有便信風翻覆易  
無心逐水去留輕  
觸崖頗似乘時意  
藏壑深關避世情  
幸喜此身元不繫  
底須壁上覓寰瀛

元日酌悠然賦坐客悠字韻

東風第一番去聲春游白袷清樽半日休花氣未醒蜂蝶  
懶宿寒猶殢雨雲愁人煙帶郭居全少林沼當軒趣迥  
幽吟過小橋歸夢晚亂鐘何處思悠悠

重過東野故居

郭外有村名孟堡舊傳君此卜幽棲草荒東野千年宅  
水遶南山一曲溪人物不生詩渺渺秋風無語恨悽悽  
可憐如許衣冠士不為留祠向竹西



歸來

小笠輕蓑卧短篷  
曉歌楚曲和漁翁  
片帆自識歸來路  
借得清江一釣風

幽興

自折疎花插小瓶  
醉眠明月讀騷經  
白雲也識幽人意  
分與秋山一半青

山中冬至

讀易燒香自閉門  
懶於世故苦紛紛  
曉來靜處叅生意

春到梅花有幾分

夜軒納涼

銀床破睡霧籠紗  
翠簟湘紋捲浪斜  
小院夜深涼似水  
一池明月浸荷花

釋斯植

斯植號芳庭住錫南嶽寺有采芝小集見遺書  
本茲葺自永樂大典中補詩二首

和子履雍家園詩

長橋南走羣山間中有雍子之名園蒼雲蔽天竹色淨暖  
香撲地花氣繁飛泉來從遠嶺背林下曲折寒波翻玲  
禽不可見毛質數聲清絕如哀彈我來據石弄琴瑟惟  
恐日暮登歸軒塵紛剝落耳目異只疑夢入仙家村知  
君襟尚我同好作詩闕放莫可攀高篇絕景兩不及久  
之想像空冥煩

送李容甫歸北都

先生讀書不下堂堂上有客語浪浪弟子出觀如堵墻

怪君眉彩生光芒北都晁夫子一别久相望君來道信  
問使我開肺腸三日不改服猶覺芝蘭香平生寡投分  
一笑且云樂慙慙發黃卷鈍吻慳應酢大杵撞啞鐘已  
厭音響惡更慙河伯觀未易窮海若索寞歲華晚颼颼  
黃葉秋歸心劇流水忽忽不可留固知此鱣鯨肯託尋  
常溝直須見老聃可化南榮儔海州歲有冲天鵠卵如  
萍實光琢玉蜀鷄眇然何敢伏羽成不須求日浴一舉  
將驚萬人目

欽定四庫全書

江湖後集  
卷二十三

五

江湖後集卷二十三

欽定四庫全書

江湖後集卷二十四

宋 陳起 撰

陳起

起字宗之錢塘人開書肆於睦親坊亦號陳道人寶慶初以江湖詩禍爲史彌遠所黥有芸居乙藁見遺書本今葺自永樂大典中補詩五十  
一首

題建溪劉希和吟趣園

欽定四庫全書

江湖後集  
卷二十四

佳氣滿吳洲琅琅謫仙句當其傲雲月風流良可慕寂  
寥數百載何人踵逸步建溪有劉侯於吟契其趣是知  
建與吳妙處同一悟水石巧縈紆烟雲互吞吐花光時  
變眩山色無旦暮物物可供吟先為梅花賦

趙紫芝運幹

陋室與高門東西互接吟相聚雖不稠相別殊難忍風  
帆去程遙到時秋未盡少試裨畫材計臺作標準恨無  
雙羽翔汨汨成蠹隱便結南浦夢獨立江風緊

芸隱提管詩來依韵奉答

君詩如梅花將盡春意幽一枝漏泄處踏雪寒曾諳肯  
踐桃李場溪山還自甘破玉暗香度似親夷甫談  
我詩如折桐經霜為一空尚可親時髦託根日華宮莫  
謂背於時會在春風中小雨灑清明又是一番紅

芸隱再和復用以酬

大藏五千卷齋沐啓寶函強名禪教律心了一一諳向  
來曾乞食此味醍醐甘拈花飲先笑意會不待談



芸隱抱奇偉未可論苦空吾皇樂詢道日御賦政宮會  
看召嚴徐敷奏陸殿中鳴靴踏龍尾豈久蓮依紅

送別曾幼廣赴漕試歸

疋馬來東吳策勲在一戰文場老燕代餘子自北面西  
風敲鐙歸山應過處戀英氣凜橫梨河海能幾見自識  
韓將軍論交今惓惓

洪扇贈別萬通父

春冰幕千絲我策美無度習習南浦秋受藏憶襲護之

子思吳鱗觸熱遙問津舉策寄薄劣却暑兼障塵荆榛  
道崎嶇輕車宜徐徐戴星秣驪駒未午投林廬酌月重  
來期名言毋重違自嗟君是客忍賦別離詩

送賀某赴興化任

賀公夢三刀恩榮被詔函家山繫比隣風俗應風譖承  
流復宣化使民思棠甘向來愷悌心今足副時談

壺山邈千里旌旗拂搖空是邦足文物教宜先泮宮嗟  
余病十載置身藥裏中追送不能遠望望畫錦紅

呈朱叢瑞

囊中五色絲擬將舜裳補玉階遠於天莫睹干戚舞治  
朝足文物一室自規矩少賤人或欺黔婁况貧窶母作  
飯牛歌春滋夜來雨

寄題當湖隱淥亭

曲逕一亭幽三十六水聚簷影接波光蟬聲入秋思開  
藻靜看雲愛月懶種樹濠上意如何疎鍾烟外寺

對菊有懷東園

青女凌波楚江冷庭前一葉鳴金井砧杵誰家試夾衣  
西風攪碎蘆花影呼童折取籬下金旋汲山泉注古鉶  
細哦七字延秋色寒香似欠東園清江上子牟懷魏闕  
離情一動腸千結急呼斗酒破霜螯楚月不礙西湖月

荅熟庵

昨宵約月臨西池冰蟾不至鶉火飛歸來一室白於晝  
乃是新詩光陸離當年應剖瓊蚌腹不然何以明於燭  
細窺字字欲走盤三復庵名悟圓熟一片情田萬古耕

有年能得幾書經小疵終是未全稔孰若先生耨穫精  
南憲寄傲遂初欲移石畦蘭更紉菊茶烟細雜玉爐沉  
研影淨涵金井淥林下今纔見一人却疑圖任思舊臣  
自昔東山豈終隱似聞鸞詔下蒼旻

送郭聖與就監試歸兼簡其弟

楚尾吳頭月光冷山鳥不鳴桂浮影破霜採得蟾邊香  
蘭菊無言秋耿耿萬年枝外淺紅牆胥山小閣憇晚涼  
湖波江浪座中接寒籌凝夢夢歌雲觴明朝忙踏槐花市

萬丈光芒生壁水  
瓜金繭紙市相高  
兀兀鉤提笑韓子  
小雁汀沙振寒羽  
亦復褰衣告歸去  
近別難甚況遠離  
一日仙舟隔輕霧

信步

信步過高崗  
隨僧到上方  
泉浸松逕潤  
風出稻畦涼  
地險人誰問  
山深屋亦藏  
惜無碑可考  
創立自南唐

三遊錢園併題四時畫圖

只因閒未得  
又慕得閒名  
一幅無盡態  
四時有餘情  
吟

清招鶴伴機熟付鷗盟坐久不知晚前汀烟水橫

遊禹廟

何期來此地重謁告成祠菲飲泉堪酌桐棺事莫知蟾  
分丹桂影龍矯老松枝拂石尋遺字苔荒大業碑

雪中送黃希聲西歸

可是歸心急行裝冒雪天向來期重任未可羨先鞭人  
事虧盈月烟波遠近船明時困英特此別又三年

蘭亭歸途

山水佳如此都忘客路難  
鷗明寒渚淨鴈入野田寬  
事久人多厭心清夢却安  
獨憐鸞翼遠誰念篋衣單

還劉雪坡詞藁

誰與分天巧裁成雲錦裳  
春花籠淡月秋水照斜陽  
得句皆奇偉知音盡老蒼  
尚期京國路相與較宮商

嘉平旦雪

天欲做奇事清寒發化機  
一雲無不覆萬物盡同輝  
水合漁烟暝山空獵火微  
夜窻歌七月三歎及無衣



天一孕真精裁成六出霏大聲聞竹折空色助梅清節  
壯蘊甘嚙兵奇驚自驚男兒須事業謾說剡舟明

答趙章泉

新詩將遠意千里附文鱗清響蟬嘯露高閒鶴卧雲但  
知耕野水不暇問朝紳賸欲陪顏笑淒涼吳楚分

借居值雪

已歎長安索米難可禁風雪滿長安無家又是於人借  
有命從來只自寬春入園林根覺煖色連天地眼生寒

西湖寂寞梅無伴  
合向孤山忍凍看

夜聽誦太極西銘

六經宇宙包無際  
消得斯文一貫穿  
萬水混茫潮約海  
三辰煥爛斗分天  
鳶魚察理河洛後  
金玉追章秦漢前  
遙夜並聽仍闍味  
奎明誰敢第三篇

挽宣教郎新差通判慶元府王琮

前月相過了無恙  
小窻畫卷手親開  
不知翁作仙遊去  
忽見兒封壙記來  
寂寂芸居香不斷  
悽悽松塢韻堪哀

客中為灑秋風淚尚想吟魂遠夜臺

謁陽明洞天

羈游何事復來東豈是三生太史公  
舞鶴臺空丹蛻井  
見龍壇古瑞名宮  
石帆酒甕遺秦蹟  
玉簡金書閱禹功  
萬壑松風秋愈壯  
直將幽意問穹隆

雪後

青山當戶牖雪後非吾有  
為問謝家池綠波還在否

雪中三絕

一天和氣到柴門檻內蘭芽也玉溫靜炷衙香誰與伴  
慈悲大士共黃昏

探梅又復負前盟曾念霜風病不禁清曉擔頭和雪買  
數枝親插供觀音

可憐切切度衆生千百年來魄尚靈自幼歸依今老矣  
濯雲曉汲薦清泠

曉寒即事

芳意迢迢客夢閒紅飛盡曉泥乾薄羅尚怯餘寒在

一陣東風剪牡丹

趙濟民生日

原注雪中見招老病畏寒荆婦獨往小詩奉寄

今歲呈祥殊勝昔六花端為壽筵開小詩聊寓千秋意  
不得相陪法喜來

第三橋詩

梅花雪岸去舟單茅屋水田白鷺寒好景幾回吟不得  
重來無語立闌干

留題天樂寓張氏湖亭

沉水香銷一局棋客來淺酌旋分題畫欄占得春多少  
簾捲東風日未西

次黃伯厚惠紙衾韻

冷浸溪藤松下月密緘遠寄袁安雪忍蹴茸茸一徑羶  
依約江行曉時節

明遠閣

風捲疎烟遠岫分天開一鏡皎無雲衰荷搖落汀洲晚  
猶舞餘香墜茜裙

雪中簡趙德行

滕六庭前三致意應翻奚錦報瓊瑤剡梅莫訝山陰棹  
寒色欺人是灞橋

脩父知縣萬里寄詩久未能答午枕夢見之覺  
而有答

夢覺疎蟬韻更淒闌干曲曲柳陰移吳蠶蜀繭綠千尺  
一種愁機兩處絲

夜誦

父子跣趺絕似僧青燈一殘夜三更讀殘戴記兒將倦  
山栗旋煨仍擘橙

月下聞桂花

一庭人靜月當空桂不多花細細風香露滴衣涼似水  
恍然移下廣寒宮

胡季懷有詩約羣從為秋泉之集輒以山果助  
筵戲作二疊

近詩通譜江西社新釀攬先天下秋已許眼中窺一豹



可容杯裏散千憂

君家香醪蜜不如試投桃李望瑤琚敢誇所無易所有  
潘郎一出果盈車

詠琴上曹先生

清如雅操直如絃此意于今久不傳月冷風高清禁地  
只將古調奏鈞天

興適安夜飲憶葵窻

人在江干月上巵不妨想像一篇詩月來即是葵窻至

對景成三憶曩時

與葦航適安飲

獻酬無算是盃行午酌從容至四更  
陶母侈於真率約  
退思無倦若為情

觥籌交錯舞僂僂延得嫦娥泛醪波  
客謂平生無此樂  
二章聊繼飲中歌

早起

今早神清覺步輕杖藜聊復到前庭  
市聲亦有關情處

買得秋花插小瓶

井亭橋


桐花夾岸柳遮山  
水面誰家燕子還  
摩利閣邊唐相井  
濯衣人散暮潺潺

分得春禽効香奩體

數聲應寄春消息  
纔轉花梢濃綠隔  
早知襟韻倦逢迎  
莫遣臨風情脉脉

喚渡

一帆又是過西陵  
天正寒時雨欲冰  
心地自平潮自險  
回瞻絳闕認觚稜



江湖後集卷二十四